

Nde moboko na Njambe ejali kotelema ngwi; ekomami na elembo mpe ete, Nkolo ayebi bato na ye. (2 Timote 2:19)

Nde Nkolo ajali sembo, ye akolendisira bino mpe akobatela bino epai na mabe.

(2 Tesaloniki 3:3)

Nkolo Yesu alobaki ete, Najali kotikela bino kimia, najali kopesa bino kimia na ngai moko. Tika ete mitema na bino mitumolana te, mibanga mpe te.

(Yoane 14:27)

Na oyo akoki kobatela bino ete, bokwea te mpe kotemisa bino na kojanga litono liboso na nkembo na ye na esengo monene, na ye Njambe Mobikisi na biso mpo na Yesu Klisto, Nkolo na biso, na ye nkembo, mpe monene mpe nguya mpe bokonji, liboso na ekeke mobimba, mpe sasaipi, mpe libela na libela. Amen.


(Yuda v. 24,25)

© C.E.R.S. - B.P. 1673 Kananga

République Démocratique Du Congo

Email: 33eme.cers.lit@gmail.com

<http://www.33eme-cers.org/>



Mpo na nini bojali kobanga?

Na mokolo yango, wana esili mpokwa koya, alobi na bango ete, Tokenda ngambo. Batiki ebele na bato mpe bakamati ye kati na bwato, lokola ejalaki ye. Mato mosusu ijalaki na ye elongo lokola. Mopepe makasi eyei mpe mbonge ibeti bwato kino elingaki kotonda na mai. Nde ye ajalaki kolala mpongi na nsuka na bwato, likolo na ekomba. Bayei kolamukisa ye, balobi na ye ete, Molakisi, ejali likambo na yo te soko tokufi? Alamuki, apekisi mopepe mpe alobi na mai ete, Tilima! Jala nye! Mopepe ekiti mpe kotilima ejalaki monene. Alobi na bango ete, Mpo na nini bojali kobanga? Bojangi kondima boni? Babangi na nsomo mpenja mpe balobani ete, Moto oyo nani ete mopepe mpe mai ikotosaka ye boye?

(Malako 4:35-41)

Banga te

Bongo tika ete bayengebeni yonso babondela epai na yo; na ntango na mpasi mpe soko mpela monene eyeli, bango ikokoma epai na bango solo te. Yo ojali ebombelo na ngai; okobatela ngai na mpasi, okojingela ngai na mingongo na kobikisa. Sela.

(Njembo 32:6,7)

Njambe akolobaka ete; Banga te, mpo ete ngai najali na yo

Banga te, jambi ngai najali na yo; yoka nsomo te mpo ete ngai najali Njambe na yo. Nakokembisa yo, nakosunga yo, nakotombola mpe yo na loboko na ngai na boyengebene. ... Nakojala na yo elongo. Nakotika yo te mpe nakolongwa na yo te. ... Ngai nalakeli yo te? Jala makasi mpe yika mpiko. Banga te mpe jala na nsomo te, mpo ete Yawe Njambe na yo ajali na yo elongo soko wapi ekokenda yo.

(Yisaya 41:10. Yosua 1:5,9)

E Njambe, yoka kolela na ngai; tia matoi na kobondela na ngai. Longwa na nsuka na mokili nakobianga yo wana ekosenjwa motema na ngai; kamba ngai kino libanga makasi, oyo eleki ngai likolo. Mpo ete yo ojali ekimelo na ngai, ndako molai na makasi liboso na bayini.

(Njembo 61:1-3)

Soko Njambe ajali mpo na biso, nani akotemela biso?

Ye oyo aboyisaka Mwana na ye te, kasi akabaki ye mpo na biso yonso, ye akokabela biso biloko yonso esika moko na ye te?

(Baloma 8:31,32)

Nani akotangola biso na bolingo na Klisto?

Boloji soko nkaka soko minyoko soko njala soko bolumbu soko likamba soko mopanga? Makomi malobi ete, Mpo na yo bajali koboma biso mokolo mobimba, bajali kotanga biso lokola bampate na kobomama. Kasi na makambo oyo yonso tokoleka kolonga na mpo na ye oyo alingaka biso. Nandimi solo ete ata kufa, ata bomoi, ata banje, ata mikonji, ata makambo na ntango oyo, ata makambo makoya nsima, ata ndenge na nguya na mokili, ata molai, ata bojindo, ata eloko mosusu nini ekoki kotangola biso te na bolingo na Njambe bojali kati na Klisto Yesu, Nkolo na biso.

(Baloma 8:35-39)

Mwana, kondima na yo esili kobikisa yo. Kenda na kimia. (Luka 8:48)

Na mboka, mwasi na masumu ajalaki ... Atelemaki nsima na ye epai na makolo na ye mpe alelaki, mpe abandaki kopolisa makolo na ye na mpisoli, mpe kokomba yango na nsuki na moto na ye, mpe kopwepwa makolo na ye, ... Yesu alobi ete, Masumu na ye mingi malimbisami, mpo ete ajali na bolingo mingi. ... Ye nde alobaki na mwasi ete, Kondima na yo esili kobikisa yo; kenda na yo na kimia.

(Luka 7:37-50)

Boluka Yawe naino akoki komonana, bobianga ye naino abelemi

penepene. Tika ete moto mabe alongwa na njela na ye mpe moto na masumu alongwa na mabanja na ye. Tika ete abutwa epai na Yawe, ete ayokela ye mawa, epai na Njambe na biso, jambi akolimbisa na solo. Mpo ete makanisi na ngai majali makanisi na bino te mpe njela na bino ijali njela na ngai te. ... Esengo na ye oyo alimbisami mabunga na ye, ye oyo masumu na ye majipami.

(Yisaya 55:6-8; Njembo 32:1)

Biso tojali na Nganga Monene

Bongo, awa ejali biso na Nganga Monene monene oyo asili koleka na Likolo, ye Yesu, Mwana na Njambe, tosimbaka eyambweli ngwi. Mpo tojali na Nganga Monene te oyo ajangi koyoka mpasi esika moko na biso kati na bolembu na biso. Nde amekami na makambo yonso pelamoko biso, bobele ete akwei na masumu te. Boye tika ete, tobelema na molende epai na kiti na bokonji na ngolu ete tojua mawa mpe tomona ngolu na kosunga na ntango na bosenga. ... Bongo ayebi kobikisa bango bakobelema na Njambe na njela na ye, awa ejali ye na bomoi libela ete abondela mpo na bango.

(Baebele 4:14-16. 7:25)